

# Opera Viva 2007 cun «Moses» da Rossini

Per la secunda gada vegn presentau a Sursaiisa ina opera en tenda

■ (mc) Per la secunda gada vegn l'uniun Opera Viva a presentar questa stad ina opera en tenda a Sursaiisa. Suentar ch'ins ha giu interpretau igl onn varga cun success «I Lombardi» da Giuseppe Verdi han ins tscharniu uonn l'opera sacrala «Moses» da Gioacchino Rossini. Previdas ein 9 presentaziuns, la premiera ha liug ils 29 da fenadur e la derniera ils 10 d'uoost. Era uonn san il menader artistic Armin Caduff, il dirigent Gion Gieri Tuor, il regissur René Schnoz ed igl artist dalla sceanaria Rudolf Mirer quintar culla collaboraziun d'in tschep fideivel da cantaduras e cantadurs ord las formaziuns La Compagnia Rossini, il Coro Opera Viva ed igl «Orchestra Giuseppe Verdi» da Budapest. Sco quei ch'il parsura da Opera Viva Thomas Mirer ha accentuau seigi il plan temerari da realisar ina opera en in vitg muntagnard gartegiaus. Per ch'in project talmein ambizius sappi vegnir realisau drovi ei plirs craps el mosaic che garanteschon ina cooperaziun optimala. Ei drovi lavur endinada dall'entira equipa involvida davon e davos las culissas. La finamira da Opera Viva seigi da promover la cultura indigena e cunzun il cant cun metter a disposiziun l'infrastructura e las finanzas necessarias. Thomas Mirer ei perschadiu che quei event cultural singular en ina regiun muntagnarda seigi era in'attraziun turistica che promovì la sentupada denter indigens ed jasters. Damai che varga 60 pertschien dils visitaders derivien d'ordeifer la regiun porti la Opera Viva la finala era in recav economic alla regiun. Tenor Christian Durisch quantan ins cun in budget da bien 900 000 francs che duei vegnir finanziaus cun las entradas dalla opera e dallas tscheinas e tras generus sponsoradis da differentas interpresas. In quen equilibrau seigi denton mo pussei-



Presentaziun dall'opera «Moses» da Gioacchino Rossini: Da sen. Gion Gieri Tuor, Thomas Mirer ed Armin Caduff.

FOTO P. DE JONG

vels grazia alla collaboraziun da numerus voluntaris che segidan gratuitamein per l'infrastructura. Nuotatonmeins hagi ins tuttina stuiu registrar igl onn vargau in deficit da 36 000 francs. Il president communal da Sursaiisa Ernst Sax accentuescha la muntada dalla Opera Viva sco impurtont arranschament cultural per la Surselva e pil Grischun che possibilteschis numerus sentupadas amicablas denter indigens ed jasters.

## Moses da Gioacchino Rossini

Sco quei ch'il menader artistic Armin

Caduff ha sincerau hagi il success contonschius cun l'opera «I Lombardi» da Giuseppe Verdi motivau dad ughiegar da prender per uonn ina opera forsa meins enconuschenta actualmein. Ei se tracta dalla ovra principala dil cumponist talian Gioacchino Rossini (1792–1868) ch'ei staus il pli impurtont e popular cumponist d'operas da siu temps. Fertion che Lombards e Saracens ein fruntai en «I Lombardi» in sin l'auter eis ei quella gada il cumbat denter Egizians ed Israelits che porschan la tensiun dramatica. L'opera Moses ha Gio-

acchino Rossini cumponiu 1818. Silsuentar ha il cumponist sez surluvrau pliras gadas quella opera. Cun grond success ei la versiun finala da 1827 vegnida dada numerus gadas el 19avel tschentener cun grond success sin differentas tribunas mundialas. Tenor Caduff eis el ius alla tscherca d'ina ovra che secumporta cullas fermeziis da ses cantadurs e che strapazescha era buc il publicum cun tematicas memia abstractas.

L'opera Moses reflectescha la perschunia dils Israelits en Egipta e lur liberaziun entras il profet Moses. Quella

ovra da Rossini sedifferenzieschi dallas ovras comicas da Rossini buca mo el cuntegn, mobein era el stil cumpositoric, di Caduff. La historia biblica culla liberaziun dramatica dil pievel israelit che percuora sauns e frestgs igl Jordan hagi in character nonomental e dramatic, aschia ch'ei drovi in chor cun vuschs vigurusas e registers bein dotai.

Sper la rolla centrala da Moses che vegn dada da Armin Caduff sez dat ei era ulteriurs rollas da solists che vegnan occupadas sche pusseivel cun giuvnas forzas indigenas, accentuescha Caduff.

Per in ulteriur punct culminont vegn era uonn igl Orchester da Giuseppe Verdi da Budapest che vegni danovamein dirigius da Gion Gieri Tuor a procurar. Siu pensum eisi buca mo d'accumpignar cantaduras e cantadurs, mobein era da persequitar e coordinar las sequenzas scenicas culs intermezzis orchestralis.

## Nov presentaziuns

Previu ei da concertar denter ils 27 da fenadur (premiera) ed ils 12 d'uoost 2007 (derniera) buca meins che nov gadas. Ina dapli che gl'onn passau. Per esser independents dall'aura han ins piazzau differentas tendas. Quellas sesanflan sil parcardi dalla staziun a val dallas Telefericas Pèz Mundaun. Las entradas ein fixadas a 90 francs per l'emprema categoria e 65 francs per la secunda categoria e 140 francs cumpriu la tscheina che vegn survida avon las produziuns en tenda. Gia la mesadad dils plazs ei reservada. Ei tucca pia da festginar per contonscher in plaz. Bigliets san vegnir reservai tier la Gruppa da medias Südostschweiz per telefon 0848 84 80 84.

Ulteriuras informaziuns: [www.operaviva.ch](http://www.operaviva.ch)

## VERSOMI

### Fusiun dil corp da pumpiers

(mc) Il suveran dalla vischnaunca da Versomi ha priu en sia davosa radunanza communal la decisiun da principi da fusiunar ils corps da pumpiers dallas duas vischnauncas da Versomi e Valendau. Approbau han ins en quei connex era la nova lescha da pumpiers dalla vischnaunca da Versomi sco era

las statutas dil Consorzi da pumpiers Valendau/Versomi. Plinavon ha la radunanza communal sbursau 14 000 francs per la cumpra d'ina casa da curtgins che sesanfla amiez il vitg. Per la sanaziun digl access viers la baselgia han ins plinavon concediu in credit da 32 000 francs.

## Gronda investiziun da Coop

La stizun a Mustér vegn modernisada per 1,6 milliuns francs

DA HANS HUONDER / ANR

■ Da miez avrel entochen miez matg vegn il Coop a Mustér serraus. Il motiv persuentar ei ina pli gronda investiziun el baghetg alla Via Alpsu. Per 1,6 milliuns francs vegn Coop a modernisar compleinamein sia stizun ed era a remplazzar tut ils indrezs. Igl onn 1975 ha Coop retratg las localitads da fatschenta el baghetg dalla Cucagna a Mustér. El decuors da quels varga 30 onns ha l'interpresa da renum svizra fatg differentas ga midadas e completaziuns. Ina modernisaziun parziala dalla stizun ei succedida 1992.

Questa primavera succeda ina sanaziun interna compleina dallas localitads da fatschenta. Sco quei che la plidadra da Coop, Ulrike Koller, ha detg sin damonda dall'Agentura da novitads rumantscha, sto la stizun vegnir serrada per quei intent dils 16 d'avrel entochen ils 15 da matg: «Essend che la sanaziun ei detg complexa e vasta eis ei buca pusseivel da schar aviert la stizun.» La reavertura ei prevedida ils 16 da matg 2007. Sin fundament da quella sanaziun ei l'idea d'in baghetg niev a Mustér ni el contuorn dil vitg pil mument giud meisa. «Entochen ussa havein nus buca cattaun in liug adattau che corrispunda als basegns e giavischs da Coop», di Ulrike Koller. Il Coop porscha a Mustér il mument 14 piazzas da lavur.

### Pli modern ed attractiv

La summa da 1,6 milliuns francs che Coop investescha en sia stizun ed ellas localitads accessorias a Mustér sereparta ton sil baghetg sco tal sco era sin l'infra-



La stizun dil Coop a Mustér vegn renovada proximamein. Per quei intent sto ella vegnir serrada duront rodund in meins.

FOTO H. HUONDER

structura ed ils indrezs. La mazlaria existenta vegn renovada compleinamein. Dalla sanaziun ein era ils locals da magasinadi e da sferdentar pertuccai. La stizun retscheiva in niev plantschiu da granit sco era ina nova illuminaziun. Remplazzai vegnan tut ils regals da rauba ed era las frestgeras e schelenteras. «Cun quella renovaziun e modernisaziun vegn il maletg dalla stizun adattaus als basegns dil temps ed als criteris da Coop ch'ei valeivels per tuttas fatschentas en Svizra», puntuescha Ulrike Koller. Cheutras sa la pli moderna tecnica da sferdentar, adattada allas directivas per la protecciun digl

ambient, vegnir applicada. En quei connex duei era la recuperaziun dalla calira vegnir optimada. «Coop less puspei poscher a sia clientella ina pussevliadad da cumpra attractiva, moderna, amicabla e clara. Dallas midadas profiteschan specialmein las partiziuns cun products frestgs. Suentar la renovaziun vegnan ellas ad esser aunc pli generusas», accentuescha la collaboratura dalla partiziun da PR e sponsoring da Coop per la regiun Svizra orientala/Tessin. Entras las midadas dallas partiziuns vegn purschiu alla clientella in meglier decuors per las cumpras prevedidas.

## Tgi gudogna in dc «accent»?

La Quotidiana regala treis exemplars dil niev disc compact romontsch «accent».

Damonda da concorrenza:

Da tgei formaziun da musica fan ils producents d'«accent» Roman Flepp ed Adrian Candinas part?

Risposta: .....

Num e schlatteina: .....

Adressa: .....

Liug: .....

Scrivi la risposta e tarmettei quest talun tochen ils 5 d'avrel a:

La Quotidiana  
«accent»  
Via centrala 4  
7130 Glion